

Kôm op Oranjespeulers !!

[Jubileum: 50 jaor rapido](#) >> [Jubileumjaar](#)



Ton vertel efkes waat euver dichzelf en wie 't zoë gekômme is.

Ik doon al 41 jaor alles same met Marlou en ik bin as elektricien mien werkend laeve begônne, maar wie det dôk geit in 't laeve kinse door toevallighede in 'n andere waereld terech kômme.

De veurgeschiedenis:

't Begôs beej de misdineers in de Lambertus parochie.

Kaplaon Jacobs vroeg mich as viertiënjäörige um op Zôndaagmiddaag in "Ons Huis" films te dreije veur de jeug.

Neet die herriefilms van noow maar "stômme" films waobej de kinder as 't spannend waar, zelf 't geluud makde.

Daonao woort d'r door 'n paar bestuursleeje van de instuif taeye unne shuttle gehouwt,

en um 7 oor meus de zaal weer in orde gemak waere veur de instuif.

Pierre Smeets en Loes Alsters ware bestuursleeje beej de instuif,

umdet ik badminton waal leuk vënd moch ik as jônge snuiter meidoon..

Vanaaf 1958 mochte de badmintonleefhebbers op vriëdaagaovend gebroék make van "Ons Huis" tot half 11.

Ik bleef lid van de toen nog naamloze badmintonclub en voetbalde auk beej SVB as verdedigende middenvelder of halfspeuler..

Op zôndaagmorge ginge de clubleeje (later Rapido) beej de Wielder in de bös renne.

Waat 'n stelletje fanatiekelinge, eine kiër traine in de waek vönde we te weinig.

We deeje 'n bietje atletiek, zoëas hardlaupe, hoëgspringe, kogelstoëte en netuurlik speulde we 'n partieke voetbal.

't Ging d'r dôk hard aan toe en mien kneen hebbe flink waat opdônders gehad.

Lets 1963 vroeg Pierre Derckx mich beej BC Venlo te kômme speule,

en in dec. 1963 bin ik euvergestap van Rapido naor BC Venlo.

Ik bleef eine kiër in de waek traine beej SVB, dus mien cönditie waar good op piël.

Weej ware 'n klasse koppel en hebbe auk vuël gewônne in de laup van de jaore.

Aaf en toe haolde we zelfs de krant in 'n kort sportberichje.

Pierre D. en ik hebbe in de jaore zestig same 't Limburgs kampioenschap gewônne taeye de toppers van daen tiëd, Rudi Den Hartog en Huib van Wijk van Heerlen.

Dan greujse toch waal 'n bietje, maar we kregte 't neet veur niks.

In diezelfde periode heb ik in keistad Amersfoort 2 jaor op 'n rie de singel gewônne van L. Hanssen oët Hoensbroek en same met um 't hiëre döbbelspel.



Det ware pas wedstrijde en 2 jaor op 'n rie bin ik netuurlik wéér 'n paar centimaeter gegreujd. 't Winne van unne inkel taeye Herman Leidelmeijer, toendertièd ned. kampioen, in 3 sets deej mich nog mièr greuje.

Det is aan mien lingte noow nimmer te zeen want op 'n gegaeve moment greujse nimmer in de lingte maar mièr in de breite.

Unne leuke thoèswedstrijd met vuël supporters in miene Rapidotièd nao 1977 waar de wedstrijd same met Pierre Vercoulen taeye Bart Vercoulen en Ruud Rejhons.

We stônde met 13-3 achter in de 3e set en hebbe toch nog gewônne met 15-13.

Ik môt zegge det ik Bartje toen waal flink van de wiès heb gebrach, det zal hae zich beslis nog herinnere.

Ik kin neet tage mien verleer (*conclusie redactie*), dus as ervare kómpetitiespeuler gebroekse dan waat leuke trucjes

um diene taegestander van de wiès te bringe.

Door mien lidmaatschap beej BC Venlo bin ik in de trainerswaereld gerold.

Op 'n gegaeve moment meuste van de Gemeinte beej elke club gediplomeerde trainers rônclaupe um de jeug te kinne traine.

Ik heb toen, same met Pierre Derckx, 'n trainersopleiding gevolg van 1,5 jaor met good gevolg.

Um örges stage te kinne laupe heb ik Marlou as schörkker gebroèk, want det had door zien werk in 't ziekehoès de juuste kóntakte.

Die schörkker, sorry---- Marlou ziene baas in 't ziekehoès waar Dr. Dusch en dae waar auk clubarts beej VVV----- en van 't ein kump 't ander.

Kint ge 't nog allemaol volge ?

Toen begós de voetbaltièd

Vanaaf 1974 kós ik stage gaon laupe beej VVV en nao mien stage woele ze mich halde as vaste verzôger.

Dao zei ik gen nae taeye maar ik meus mich waal vaerder ôntwikkele in de sportmassage.

Ik bin in de wiekende en 's-aoves unne speciale cursus gaon volge en as aanvölling nog 2 jaor de pedicureopleiding.

Zoë kriegse in de laup van de jaore hiël waat pepeerkes beejein.

Tot 1993 heb ik full-time beej VVV gewerk en mich veural bezig gehalde met 't 1e elftal, 2e elftal en de aldste jeug van 16-17 jaor.

In 't ziekehoès wis ik nao 'n paar maond al prima de waeg naor de diverse aafdeilingen en specialiste.

Det ware drökke jaore waarin ik vuël leuke dinger meigemak hebbe.

't Promotiefiës in 1984 waar 'n geweldige happening in de stad en de kater is nog 'n paar daag bliève hange.

Marlou werkde as vrijwilliger in 't speulershome en haet alles van dichbeej meigemak.

In den tössentièd bin ik nog 11 jaor verzôger gewaes beej de dameshockeyclub VHC.

Jao, euver dames- of hiërebein hoove ze mich niks wiès te make, ik heb d'r in de laup van de jaore hiël waat gestreke.

Trouwes neet allein de bein, de sporters kreges op de gekste plekke klachte en dan probeerde



ik die op te losse.

Bandages, tapes, iéspack, massage, ik heb al hiël waat "vleis" ônder de vingers gehad.

Intösse waar ik in 1977 van BC Venlo weer euvergestap naor Rapido.

In de BC-Venlo periode heb ik geregeld **taege** Rapido gevoetbald en nao 1977 **met** Rapido, mekkelik zat.

Beej Rapido waar voetballe net zoë belangrièk as badmintonne.

Zelfs de dames hebbe beej Pinge Nell in Lomm en in

Baolder 'n stevig partieke gevoetbald, althans ze zeie d'r damesvoetbal taeg !



Nao de VVV-periode heb ik 'n jaor beej Bor. Mönchengladbach gewerk as fysiotherapeut.

Toen de sterspeuler Stefan Effenberg aangekoch woord, meus de medische staf inkrimpe en kós ik waal bliëve maar kreeg d'r maar unne habbekrats veur.

Ut waar neet mien bedoeling um Effenberg dieke mercedes te laote riej van mien salaris!

Dus heb ik d'r 'n punt achter gezatte in M.Gladbach en heb toen 'n paar maond sabatical genaome.

In 1994 kwaam FCV vraoge um unne stagiair te begeleide, det heb ik gedaon.

Ik bin nog steeds verzôger beej FCV en de stagiair haet ziene waeg gevônde haop ik.

Zoë blifse van de straot, ik vind 't plezeerig met minse bezig te zien en netuurlik met voetbal.

Hebs dich noow dien flat versierd en de gansen daag dien oranje t-shirt aan.

Ik heb mien flat neet versierd. maar op 't balkôn zit ik op unne oranje handdook, telt det auk ?

In de flat meug ik neet op miene Vuvuzela blaoze, det guf trammelant met de buure.

As ik ens flink wil blaoze, riej ik efkes de groëte hei op want de knien hebbe d'r gen las van.

'n Oranje t- shirt heb ik auk neet want oranje steit neet beej mien haor.

Ik hoof neet alle wedstrijde te zeen maar gaondewaeg wuerd 't spannender en zal ik waat miër veur de TV zitte.

Aaf en toe zitte Marlou en ik same op de bank voetballe te kiëke, maar nimmer zoë dôk as vruuger.

Waat vindse d'r van det Ruud van Nistelrooy neet mei mog naor Z. Afrika en Klaas Jan Huntelaar waal.

't Is jaomer det Ruud van Nistelrooy d'r neet beej is, hae haet 't good gedaon beej HSV Hamburg.

Huntelaar haet beej Milaan toch vreej vuël op de bank gezaete.

As ik Bert van Marwijk waar had ik 'n andere keus gemak, maar hae haet mich neet gevraog.

Messchien zit Huntelaar straks auk op unne oranje handdook op de bank.

Wao dinks dich aan beej de groëte 4

Det ze veurzichtig mötte zien met dae "Glaze man".

Ze kinne baeter zegge: de groëte **5** en dan bedoel ik neet de Zuid-Afrikaanse groëte **5**:

Den buffel, den ölifant, de lieuw, de neushoorn en 't luipaerd maar dan bedoel ik Dirk Kuijt.

Dae hebbe ze hard nuedig noow Robben geblesseerd is, let maar op.

Kuijt haet alles gespeuld beej Liverpool zônder blessures en wae makde de 1e goal taeg

Denemarke.....juus.

Hadde ze veur de achterhoede maar 4 groëte um de paort dich te halde beej de kieper, det is dink ik de zwaake plek.

Waat vindse van de bedrage die veur voetballers betaald waere.

Det zien netuurlik belachelikke bedraage gewaore, al hebse maar 'n korte carrière as voetballer, dan nog.

Veur speulers die van boète de EU naor Nederland kômme is zelfs 'n minimum bedraag vasgesteld waat ze môtte verdeene.

Zoë waar VVV veur de goldhaenkes Honda en Babangida un leuke springplank naor mièr. Stan Valkx en Dick Advocaat zien nog bekinde name die vruuger beej VVV actief zien gewaes.

Waat geisse doen as Nederland waereldkampioen zoel waere.

Veur mich zien de kanshebbers: Italië, Brazilië en Spanje.

Maar vergaet de Prusse neet, die greuje altièd in 'n toernooi en 't zien doorzetters

In de 1e wedstrijd taeg Australië hebbe ze zich nog aardig kinne spare, de 2e waar unne taegevaller,

maar hald "Die Mannschaft" in de gate.

Zoel Nederland waereldkampioen waere dan gaon ik lekker de stad in, op 'n terras zitte, minse kiëke en geneete.

Dich bis verzörger beej FCV, waat is 't verschil tösse FCV en BC Rapido, boète 't verschil voetbal-badminton

Voetbal is 'n teamsport, de speuls met 11 man en de bis afhankelijk van de taegestander..

't Is duudelik 'n kóntaksport en de taegestander kin door vieze tackels dien spel duchtig beïnvloede.

De kans op blessures is grutter en zeker op ernstige blessures.

Daorum haet de verzörger volop werk, zelfs beej 't amateurvoetbal, beej de profs is 'n gans medisch team aanwezig.

De gaele en roëje kaarte zien beej voetbal dök hard nuedig, zeker de letste 10 jaor.

De hoofs neet bang te zien veur unne tenniser of veur de achillespees, det zien mièr badmintonblessures.

Badminton is 'n individuele sport en de meugs met maedjes speule, det is netuurlik meigenaome.

De kriegs 3 kanse um dich te bewièze en in de mix en de hière-döbbel hingk 't mede van diene partner aaf netuurlik.

Beej badminton is as verzörger gen drueg broëd te verdeene, allein beej de ned. kampioenschappen meug d'r unne optraeje.

Met wae zoelse 24 oor door wille bringe of 'n beschuutje wille aete en waarom.

Ik zoel gaer met Mark van Bommel 24 oor op wille trekke um ens te kiëke wie beej 'n club as Bayern München alles reilt en zeilt.

D'r is 'n flink klasseverschil, veural waat medische begeleiding betref, tösse b.v. VVV-Mönchen-Gladbach en Bayern München.

Dit haet effe niks met voetballe te make:

Ik zoel gaer op 't ind van dit jaor, begin volgend jaor 'n beschuutje wille aete met mien



paetekind Saskia in Canada,
maar dan waal 'n beschuut met..... blauwe sókkerkäärkes.
Wae wet wuerd 't unne voetballer, we zien beniejd !

Hebs dich 'n laevesmotto en waat is det.

Zoëvuel meugelik geneete, dus plök den daag.
Ik heb beej Piëtrus aan de paort gestaon 'n paar jaor
geleeje en dan zuüse bepaolde dinger toch anders.

Waoreuver wilse nog waat kwièt.

As oètsmièter 'n typische Cruyf-oètspraak:

**"Zoëlang de oranjeploog den bal in zien bezit haet,
kin de taegestander neet score".**



Maar det zal Bert van Marwijk waal taege de jônges zegge veurdet ze 't veld op gaon !

Elly van Elswijk

Commentaren

ein bietje teleurgesteld door N. Timmermans-Winter op 20-06-2010 om 16:39

Wat ein drök laeventje leeve Ton, maar.....vergits dich neet nog wat?

Knap door R. Doesborg op 22-06-2010 om 15:00

Waat waas det vruuger toch ein knap gezich, jaomer hè ?!